

金史卷三

元中書右丞相總裁托克托等修

本紀卷三

太宗

太宗體元應運世德昭功哲惠仁聖文烈皇帝諱晟本

諱烏奇邁

原作吳
乞買

世祖第四子母曰翼簡皇后納喇氏

太祖母弟也遼太康元年乙卯歲生初爲穆宗養子收

國元年七月爲安班貝勒太祖四出征伐常居守天輔

五年賜詔曰汝惟朕之母弟義均一體是用汝貳我國

政凡軍事違者閱實其罪從宜處之其餘事無大小一

依本朝舊制天輔七年六月太祖次鴛鴦灤有疾至諤

都山驛召赴行在詔曰今遼主盡喪其師奔於夏國遼

官多囉約索

原作特
列遙設

等劫其子雅里而立之已留宗翰

等措畫朕親巡已久功亦大就所獲州部政須綏撫是

用還都八月中旬可至春州汝率內戚迎我若至豹子

崖尤善八月乙未會於渾河北戊申太祖崩九月乙卯

葬太祖於宮城西南古倫貝勒杲鄆王昂宗峻宗幹率

宗親百官請正帝位不許固請亦不許宗幹率諸弟以

赭袍被體寘璽懷中丙辰卽皇帝位己未告祀天地丙

寅大赦中外改天輔七年爲天會元年癸酉發春州粟

振降人之徙於上京者戊寅詔諸明安賦米給戶口在內地匱乏者南路軍帥棟摩敗張覺於樓峯口十月壬辰詔以空名宣頭百道給西南西北兩路都統宗翰曰今寄爾以方面如當遷授必待奏請恐致稽滯其以便

宜從事己亥上京慶元寺僧獻佛骨却之棟摩及張覺

戰於兔耳山棟摩敗績十一月壬子命宗望問棟摩罪

以其兵討張覺壬戌復以空名宣頭及銀牌給上京路

軍帥實古納

原作實古迺

博勒和

按此與本卷後之博勒和非一人

等癸亥

宗望以棟摩軍發廣寧下瀕海諸郡縣詔諭南京割武朔二州入於宋羅索破朔州西山擒其帥趙公直貝勒

幹魯別及博爾蘇

原作勃列速

破走伊實布達

原作白答

於歸化

己巳徙遷潤來隰四州之民於瀋州庚午宗望及張覺戰於南京東大敗之張覺奔宋城中人執其父及二子以獻戮之軍中壬申張忠嗣張敦固以南京降遣使與張敦固入諭城中復殺其使者以叛己卯詔女直人先有附於遼今復虜獲者悉從其所欲居而復之其奴婢部曲昔雖逃背今能復歸者並聽爲民十二月辛巳蠲民間貸息詔以咸州以南蘇復州以北年穀不登其應輸南京軍糧免之甲午詔曰比聞民間貧困乏食至有鬻其子者其聽以丁力相等者贖之是日以古倫貝勒

杲爲安班貝勒宗幹爲古倫貝勒遣貝勒李靖如宋告
哀

二年春正月庚戌朔以們圖琿爲阿斯罕

原作阿捨

貝勒參

議國政壬子命賞宗望及將士克南京之功赦棟摩罪

甲寅以空名宣頭五十銀牌十給宗望戊午詔貝勒完

顏愛實拉

原作阿實賚

曰先帝以同姓之人有自鬻及典質

其身者命官爲贖今聞尙有未復者其悉閱贖之癸亥

以東京比歲不登詔減田租市租之半甲戌西南西北

兩路都統宗翰宗望請勿割山西郡縣與宋上曰是違

先帝之命也其速與之夏國奉表稱藩以下寨以北陰

山以南伊蘇伊喇

原作耶刺

部圖魯

原作吐祿

灤西之地與之丙

子貽宋書索俘虜叛亡丁丑始自京師至南京每五十

里置驛二月詔有盜發遼諸陵者罪死庚寅詔命給宗

翰馬七百匹田種千石米七千石以振新附之民丁酉

命徙伊蘭路達貝勒完顏忠於蘇伯水乙巳詔諭南京

官僚大小之事必關白軍帥無得專達朝廷丙午宗翰

乞濟師詔有司選精兵五千給之丁未命宗望凡南京

留守及諸闕員可選勲賢有人望者就注擬之具姓名

官階以聞三月己酉朔命宗望以宋歲幣銀絹分賜將

士有功者庚戌叛人呼必台

原作活孛帶

降詔釋之宗望請

選良吏招撫遷潤來隰之民保山砦者從之己未宗望以南京反覆凡攻取之計乞與知樞密院事劉彥宗裁決之劉公胄王永福棄家踰城來降以公胄爲廣寧尹永福爲奉先軍節度使辛未夏國王李乾順遣使上誓表閏月戊寅朔賜夏國誓詔辛巳命置驛上京春泰之

間己丑烏庫哩

原作烏虎里

達魯特

原作迪烈底

兩部來降丙午

旣許割山西諸鎮與宋以宗翰言罷之是月舍音

原作斜野

襲約尼

原作遙輦

扎古雅

原作古牙

走之獲其妻孥羣從及豪

族貝勒琿楚等破奚七巖而撫其民人四月己酉以宗翰經略西夏及破遼功賜以十馬使自擇其二餘以分

諸帥振上京路西北路降者及新徙嶺東之人戊午以實古納所築上京新城名會平州乙亥詔贖上京路新

遷寧江州戶口賣身者六百餘人宋遣使來弔喪以高

卓佛和

原作尤僕古

等充遺留國信使高興輔劉興嗣等充

告卽位國信使如宋五月丁丑朔上京軍帥實古納以所獲印綬二十二及銀牌來上癸未詔曰新降之民訴

訟者衆今方農時或失田業可俟農隙聽決丁亥博索

路明安富勒呼

原作僕盧古

以賊罷以穆昆實訥埒代之乙

巳海蘭路軍帥完顏呼嚕古

原作忽刺古

等言往者歲捕海

狗海東青鴉鶻於高麗之境近以二舟往彼乃以戰艦

十四要而擊之盡殺二舟之人奪其兵仗上曰以小故

起戰爭甚非所宜今後非奉命毋輒往棟摩克南京殺

都統張敦固七月壬午皇子宗峻薨丙戌禁外方使介

宄從多者壬辰和碩台

原作鶻實答

言高麗納吾叛亡增其

邊備必有異圖詔曰納我叛亡而弗歸其曲在彼凡有

通問毋違常式或來侵略整爾行列與之從事敢先犯

彼者雖捷必罰乙未以烏琿

原作烏虎

部及諸營叛以齋

原作

貝勒昱等討平之八月乙巳朔以貝勒烏哲訥

原作鳥爪

乃等為賀宋生辰使丁巳薩里罕

原作撒離改

部明安齊蘇

原作以賊罷以奚金嘉努

原作金家奴

代之六部都統達蘭

擊走扎古雅殺其隊將克爾叟

原作曷魯燥

博斯呼

原作白撒曷

等又破降駱駝山金源興中諸軍詔增給銀牌十十月
甲辰朔夏國遣使謝誓詔戊午天清節宋夏遣使來賀
甲子詔發寧江州粟振泰州民被秋潦者約尼扎古雅
率衆來降興中府降丙寅詔有司運米五萬石於廣寧
以給南京潤州戍卒命南路軍帥棟摩以甲士千人益
哈斯罕路貝勒完顏愛實拉以備高麗戊辰西南西北
兩路權都統幹魯言遼詳袞托卜嘉來奔言耶律達實
自稱爲王置南北官屬有戰馬萬匹遼主從者不過四
千戶有步騎萬餘欲趨天德駐伊都

原作余睹

谷詔曰追襲

遼主必酌事宜其討達實則俟報下十一月癸未棟摩
下宜州拔叔枓山殺節度使韓慶民癸卯詔以米五萬
石給達蘭實古納十二月戊申以貝勒高居慶等爲賀
宋正旦使

三年正月癸酉朔宋夏遣使來賀戊子同知宣徽院事

韓資正加尙書左僕射爲諸宮都部署乙未夏遣使奠

幣及賀卽位宋遣使賀卽位二月壬戌羅索獲遼主於

伊都谷丁卯以巴噶

原作
龐噶

城地分授所徙烏庫哩德喀

勒

原作
迪烈

二部及契丹民三月乙亥阿斯罕貝勒們圖琿

薨丙子振奚契丹新附之民辛巳建乾元殿幹魯獻傳

國寶以瑪克實來附請授印綬是日賜完顏羅索鐵券
四月壬寅朔詔以遼主赴京師丁巳南路軍帥扎拉以
罪罷五月己丑蕭巴錦原作八斤獲遼玉寶來獻六月庚申
以獲遼主遣李用和等充告慶使如宋七月壬申禁內
外官宗室毋私役百姓己卯南京帥以錦州野蠶成鹽
奉其絲綿來獻命賞其長吏詔權勢之家毋買貧民爲
奴其脅買者一人償十五人詐買者一人償二人皆杖
一百甲申詔南京括官豪牧馬以等第取之分給諸軍
以耶律固等爲宋報謝使八月癸卯幹魯以遼主至京
師甲辰告於太祖廟丙午遼主延禧入見降封海濱王

壬子詔有司揀閱善射勇健之士以備宋九月壬午廣

寧府獻嘉禾癸巳保州路達貝勒瓜爾佳薩哈以罪誅

以貝勒圖克坦烏里

原作徒單烏烈

代之十月甲辰詔諸將伐

宋以安班貝勒果兼領都元帥伊拉齊貝勒宗翰兼左

副元帥先鋒經略使完顏希尹爲元帥右監軍左金吾

上將軍耶律伊都爲元帥右都監自西京入太原六部

路軍帥達蘭爲六部路都統舍音副之宗望爲南京路

都統棟摩副之知樞密院事劉彥宗兼領漢軍都統自

南京入燕山詔建太祖廟於西京召頁魯

原作耶魯赴京師

教授女直字戊申有司言權南路軍帥和碩台官吏貪

縱詔鞫之壬子天清節宋夏遣使來賀丁巳以棟摩爲

南京路都統蘇赫

原作掃喝

副之宗望爲棟摩劉彥宗兩軍

監戰壬戌詔曰今大有年無儲蓄則何以備饑饉其令

牛一具賦粟一石每穆昆爲一廩貯之宋易州戍將韓

民毅以軍降處之蔚州十一月庚辰以降封遼主爲海

濱王詔中外辛卯南路軍帥司請禁契丹奚漢人挾兵

器詔勿禁以張忠嗣權簽南京中書樞密院事十二月

庚子宗翰下朔州甲辰宗望諸軍及宋郭藥師張企徽

劉舜仁戰於白河大破之布希

原作蒲莧

敗宋兵於古北口

丙午郭藥師降燕山州縣悉平戊申宗翰克代州乙卯

中山降丙辰宗望破宋兵五千於真定戊午宗翰圍太原耶律伊都破宋河東陝西援兵於汾河北甲子宗望克信德府

四年春正月丁卯朔始朝日降臣郭藥師董才皆賜姓完顏氏戊辰宗弼取湯陰大臭攻下濬州達呼布取黎陽己巳諸軍渡河庚午取滑州宗望使吳孝民等入汴問宋取首謀平山童貫譚稹詹度及張覺等宋太上皇帝出奔癸酉諸軍圍汴甲戌宋使李稅來謝罪且請修好宗望許宋修好約質割三鎮地增歲幣載書稱伯姪戊寅宋以康王構少宰張邦昌爲質辛巳宋上誓書地

圖稱姪大宋皇帝伯大金皇帝癸未諸軍解圍二月丁酉朔夜宋將姚平仲兵四十萬來襲宗望營敗之己亥復進師圍汴宋使宇文虛中以書來改以肅王樞爲質

遣康王構歸師還壬子以滑濬二州與宋宗翰定威勝

軍攻下隆德府丁巳次澤州海濱王家奴誣其主欲亡

去詔誅其首惡餘並杖之三月癸未尼楚赫圍太原宗

翰還西京四月癸卯宗望使宗弼來奏捷乙丑耿守忠

等大敗宋人於西都谷五月辛未宋种師中以兵出井

陘癸酉完顏和尼

原作活女

敗之於殺熊嶺斬師中於陣是

日巴爾斯

原作拔离速

敗宋姚古軍於隆州谷六月丙申朔